

PM pernah suntik lelaki. dakwa diri kebal UM 21 JUL 2000

ALOR SETAR 20 Julai — Datuk Seri Dr. Mahathir Mohamad hari ini menceritakan pengalamannya sebagai seorang doktor berhadapan dengan orang yang mendakwa kebal dan tidak lut senjata tetapi tewas dengan jarum suntikan.

Katanya, ketika menjadi doktor pada tahun 1969, beliau sempat menguji seorang lelaki yang datang ke kliniknya di sini mendakwa kebal dan tidak cedera jika ditetak dengan parang.

"Ada orang kebal pada tahun 1969 dulu, kononnya tetak tak makan, saya suruh dia datang ke klinik di Alor Setar inilah, saya tanya dia (kalau) cucuk jarum masuk tak... dia kata tak masuk...(tetapi) tot...masuk juga," ujarnya disambut gelak ketawa para pemberita yang menghadiri sidang akhbarinya selepas merasmikan Konvensyen LJMNO Kedah 2000, di sini, hari ini.

Perdana Menteri berkata, sebenarnya lelaki tersebut tidak kebal sebagaimana yang didakwanya dan tindakannya belajar ilmu kebal itu adalah sesuatu yang bodoh.

Beliau menyentuh isu kebal ekoran dakwaan anggota-anggota Al-Maunah yang merompak senjata di Gerik, baru-baru ini bahawa mereka mempunyai kekebalan dan tidak lut senjata.

"Saya percaya dengan ujian bukannya dengan cakap," tegasnya sambil mencabar mereka yang mendakwa kebal supaya datang berjumpa dengannya.

"You cakap you kebal, mai sini...kalau berani saya tembak kalau dia mahu," ujarnya.

Ujarnya, orang yang mendakwa kebal sebenarnya penipu dan hanya mahu 'membuat' duit dengan membuat dakwaan bahawa dia kebal.

"Siapa yang kata kebal, mari sini saya kelar dia dengan pisau, tengok dia berani ke tidak, penakut, bacul, jenis orang yang paling bacul sekali adalah orang yang cari ilmu kebal," katanya.

Katanya, orang yang benar-benar berani ialah mereka yang tahu mengenai bahaya yang akan dihadapi dalam mencapai matlamatnya dan sanggup mengambil apa juga tindakan bagi menjaga keselamatan diri.

"Orang panjat Gunung Everest...itu berani. Ini suruh panjat Bukit Jenalek (di Sauk) pun tak boleh," ujarnya.